

四庫全書

集部

欽定四庫全書

宋元詩會卷六十一

兵部主事陳焯編

金詩附

司馬朴 以下天水留金五人

朴字文季溫公之猶子宋兵部侍郎以奉使見留  
居于祁陽授以官託疾不拜遨遊王公之門以壽  
終文季工書翰有晉人筆意金主嘗購其遺墨學  
之有雪霽同韓公度登圓福寺閣詩今略載于此  
積雪日出杲雪飛梅已殘朋遊要及時閣鄰有遐  
觀乘此蕪穢平快覽天宇寬霽色濕銀界空望連

江千山如白毫相混溢清揚端一氣轉浩渺萬里  
皆瀾漫優哉賦梁苑想像排廣寒下句俱殘缺不  
可讀云

無餘居士齋壁有沈傳師遊道仙岳麓詩石刻穆  
仲等和之因亦次韻

湘西勝景豈易論羣山騰闖萬馬奔鶴泉一麓騫鵬噉  
松風十里藏祇園當時侍御過題寫筆力孰敢爭雄尊  
東京少年妙詞藻南陽舊族齊陰樊天心月脇出奇語  
使我展讀忘朝昏差差戈劍隱一敵落落旗鼓嚴千屯

無餘居士厲幽志細研六藝方專門凍齎嬌兒慣腸覓  
啼饑瘦婦餘淚痕惟君德義克相愜每窮道妙角與根  
他人勸酒驚逐魂二子頻酌勤空樽醉中詩成渺江海  
風外旂影徒相翻卷藏篋笥已戢戢風生襟袖何軒軒  
嗟乎我亦有餘腐陋哉羊政囚華元

滕茂實

字秀穎姑蘇人初名裸徽宗改賜焉以太學正兼  
明堂司令與樞密路允迪翰林修撰宋彥通奉使  
割三鎮太原尋奉密詔據不下國相怒囚使人於  
雲中欽宗北遷秀穎謁見涕泣相從行主者不之

許放允迪彥通南歸茂實留雁門與兄宗正承福  
字伯壽淮南發運使倚共居久之家人至自汴梁  
秀穎往來并代之間布衣終身臨終令黃櫨裹尸  
而葬仍大刻九字云宋使者東陽滕茂實墓士大  
夫哀其忠為之起墳于雁門歲時致祭雁門李鍾  
秀挺云喪亂以來家所藏書焚蕩都盡避兵山中  
民家偶于破箱中得秀穎詩一編紙已敗爛前序  
秀穎自作可辨者百餘字大畧言能安於死生之  
分而不能忘感慨不平之氣又曰蘇屬國牧羊海  
上而不能忘感慨不平之氣又曰蘇屬國牧羊海  
吏林泉野老彥古彥古不著姓年七十八手錄三  
滕始末號東陽滕秀穎鳳山思遠記者詩數百首  
可讀者十六七臨終一詩缺三五字而已非筆吏  
此集則秀穎之事無以見於世蓋先生名節凜然  
不媿古人其文字言語宜有神物護持雖埋歿之  
久而光明發見決有不可掩焉者歟倚字恐悞當

作祠見南中  
高濟叔碑

臨終詩

并序

某奉使亡狀不復反父母之邦猶當請從主行以全  
臣節或怒而與之死幸以所仗節旛裹其尸及有篆  
字九為刊之石埋于臺山之下不必封樹蓋昔年大  
病夢遊清涼境界覺而失病所在恐于此有緣如死  
窮微則乞骸骨歸悉如前禱預作哀詞幾于不達方  
之淵明則不可亦庶幾少游之遺風也

藿鹽老書生謬列王都官索米了無補從事敢辭難殊  
鄰復盟好仗節來榆關城守久不下川塗望漫漫儉輩  
果不惜一往何當還牧羊困蘇武假道拘張騫流離念  
窘束坐閱四序遷同來悉言歸我獨留塞垣形影自相  
弔國破家亦殘呼天竟不聞痛甚傷肺肝相逢老兄弟  
悼歎安得宣波瀾卷大厦一木難求安就不違我心渠  
不汗我顏昔燕破齊王羣臣望風奔王蠋猶守節燕人  
有甘言經首自絕脰感慨今昔傳未嘗食齊祿徒以老

為民況我祿數世一死何足論遠或死江海近或死朝  
昏歟我不須衣裹尸以黃幡題作宋臣墓篆字當深刊  
我室尚少女兒女皆童頑四海無置錐飄流倍悲酸誰  
當給衣食使不厄飢寒歲時一酹我猶足慰我魂我魂  
亦悠悠異鄉寄沈寃他時風雨夜草木號空山

喜雨

早暝雨霑渥豐穰都不疑商羊應屢舞布穀強多知龍  
見寧非數雲行自有時當年班夏令曾得近丹墀



哀隆德守臣張確確浮休張舜民之弟嘗為烏雅  
帥幕獨不延謁童貫作詩弔之

睢陽萬古一張巡忠義傳家有世臣顏子服膺當入室  
潘郎望拜肯同塵圍城抱恨天猶晦仗劍臨危氣益振  
歎子鄰邦盡曹李偷生端作九泉人

天寧節有感

節臨重十慶天寧古殿焚香祝帝齡聲在北方金佛剎  
眼看南極老人星千官花覆常陪燕萬里雲遙阻在廷

松柏滿山聊獻壽小臣孤操亦青青

汴梁故老云徽宗本以五月五日生

以俗忌移之十月十日  
故此詩有重十之句

### 雨後蔬盤可喜偶成

過雨盤蔬日日新從今休歎庾郎貧  
寒虀安取咄嗟辦火食不憂生死鄰  
野覓何施雖可鄙美芹欲獻去無因  
干戈萬里風塵晦慚愧平生肉食人

### 五日

節物驚心動遠思熏風又見浴蘭時  
空尋好句書紈扇

無復佳人繫絲絲酒注菖蒲唯欲醉筒包荻黍不勝悲  
明年此日當何處風裏孤蓬自不知

偶成

纖雲卷盡見愁容古木交陰一掃空雪壓羣山曉來雨  
沙侵缺甃幾番風欲歸未得人將老屢送還來鬼亦窮  
賴得子卿佳傳在整冠時讀慰飄蓬

立春

東皇布政物皆春山色禽聲便可人滿谷和風消積雪

半窗晴日動遊塵  
宮花插帽枝枝秀  
菜甲堆槃種種新  
拘窘經時成土俗  
聊從一醉適天真

### 何宏中

字定遠先世居雁門叔祖青出武弁任忻州兵馬  
使因家焉祖中行宣西遊遇仙不返行宣之子子奇  
子霖政和中中武舉高科子奇秉義郎武州宣寧  
尉子霖忠翊郎守豐州安豐砦皆沒王事定遠子  
奇子也幼倜儻儀觀秀整雅以奇節自許宣和末  
方賊擾江浙定遠以太學武舉進士陳破賊三策  
徽宗褒諭謂非近日言事者所可比已而破賊如  
定遠策遂知名宣和元年集英殿試策第二調滑  
州韋城尉汴京被圍州郡多避走獨韋不下兵退  
統制武漢英奏辟欽宗御札召赴軍前以路塞不

果因請兵真定宣撫司時副帥師中兵已潰宣撫司檄定遠副漢英守銀冶路既而太原破西路無完城定遠等提兵竝山而東將赴援京師俄漢英戰死定遠收合散亡立山柵七十四所號令所及千里而遠艱食數月人不敢相食詔以為武節大夫河東河北兩路統制接應使是後金兵日盛所守唯銀冶一城而已金師募人生致定遠天會五年二月糧盡被擒大帥札拉憐其忠解縛授以官定遠投牒于地曰我常以此物誘人出死力若輩乃欲以此嚇我耶帥嘉其不屈又問欲還鄉否定遠謀南奔陽以願歸為言會監送使臣有先與定遠相攻却者愬之囚西京府君廟二年帥一日召之授以官又不拜使之充軍亦不從取家屬填城黃龍府益偃蹇不行帥怒褫衣欲斬之定遠忻然就戮曰得死所矣擁之行已數十步帥終不忍召還問爾授官不願充軍又不行填城又不行斬

又不懼畢竟如何定遠徐曰生死在公奚問為師  
怒解繫之西京獄得州人保任者數十族乃放歸  
請為黃冠時神霄宮廢道士舊以徽宗為東華君  
將毀其像定遠為起紫微殿遷像事之年六十三  
正隆四年病歿自號通理先生所著成真通理二  
集藏于家州將傳慎微幾先贈詩云故人何定遠  
造物不虛生骨骸稜稜瘦詩篇字字清世皆尊道  
義我獨見忠誠尊酒分攜後何時復共傾其餘與  
朱少章輩唱酬甚多皆為  
所推重載之墓碣之陰

### 述懷

馬革盛尸每恨遲西山餓踣更何辭姓名不到中興歷  
付與皇天后土知

姚孝錫

字仲純，豐縣人。政和四年，登科調代州兵曹。金兵入雁門，州將議以城降，官屬恇怯，投死無所。仲純投牀大斂，略不以為意。金帥就註五臺簿，未幾移疾去。因家五臺，善治生，亭榭場圃，富於遊觀。賓客日盈其門。州境歲飢，出家所藏粟萬石賑貧乏。多所全濟。鄉人德之。中年之後，以家事付諸子，放浪山水間。詩酒自娛，醉軒其自號也。資稟簡重，喜怒不形于色。棄官時年二十九，至八十三乃終。名士大夫為詩以弔者，數十人。仲純長于尺牘，所著鷄肋集，喪亂以來，止存律詩五卷而已。今略載于此。次冠卿韻云：節物後先，南北異人情。冷暖古今同。次趙獻之韻云：紅纈退風花，著子綠鍼浮。水稻抽秧，溪野早春云：久客交情，諸冷暖衰年病骨識陰晴。春日和德充云：烟染綠絲迷別浦，雨催紅糝綴

長條雜詩云愁邊日晷偏疑短夢裏江山未當歸  
盤無兼味慙留客夢厭多歧不到鄉賦雪云酒敵  
餘威翻索莫詩含幽思倍清新雨云岍漲魚吹沫  
山空石轉雷峰山寺云谷虛繁地籟境寂散天香  
雲生古木千章秀山抱晴川一掌平懷士曾云詩  
忙疎酒醖俸薄減厨烟感懷云玄宴暮年常抱病  
子山終日苦思歸古詩尤  
有高趣恨不復見之矣

### 睡起

睡起日侵牖開門遙見山曉風吹臘盡芳草惹春還烟  
暖鶯遷谷雲低雁渡關衰年人事減遇酒得開顏

### 閒居



無客訪衰殘柴門盡日關耽書真是癖惜酒近成慳苔  
徑行搜句茅檐臥看山却嫌明鏡裏偏照鬢毛斑

次韻李相公偶成

簾鳥呼歸夢竹風追夕涼感時空有淚却老分無方流  
水依山白孤雲帶日黃無人共尊酒散髮臥藜牀

春日書懷

雲散交情薄棋翻世態新山容猶帶臘鳥語已回春節  
物驚心遽丘園入夢頻東風如解語端笑未歸人

用峰山舊韻

春水上堤沙春晴散望賒衰年花近眼久客夢還家映  
日孤鴻沒迎風雙燕斜平生江海意蚤晚送浮槎

次韻秋興

老畏年光速愁添旅夢多西風著梧竹歸思入烟波夜  
永憑詩遣顏衰得酒和故溪千樹柳誰復曬漁蓑

溪橋早春

輕黃未染柳梢勻連日溪風捲塞塵乍暖乍寒花信晚

相呼相喚鳥聲頻少勤謾挾經綸策老懶空餘病患身  
追憶故園桃李樹年年紅紫為誰新

生涯

生涯甘分寄耕桑山色圍門水遶牆因病久懲耽酒癖  
愛閒仍有和詩忙簷冰滴砌春猶冷野馬浮川日漸長  
舊事老年多記憶故園歸夢正悠颺

柳溪別墅

安車隨意飽甘肥晚食徐行理亦齊山市日高人未集

柴門客至鳥先啼  
溪橋散望攜筇度  
野寺牽吟信筆題  
容膝易安聊自適  
甕天閒看舞醯雞

次李平子登臺有感

落日孤雲帶遠岡  
戍樓烟瘴舊邊場  
疫民卒歲方懷土  
遠客憑高自憶鄉  
漢使一朝延四皓  
秦詩千古弔三良  
行藏此意無人解  
聊借青山送酒觴

和成冠卿見寄

別恨頻添鬢雪深  
百年懷抱鬱沈沈  
標名不挂金銀榜

涉世空堅鐵石心俗物何勞供一醉殘僧正欲伴孤吟  
朱絃三弄虛簷寂唯有清風是賞音

感白髮

彈鋏憑誰聽客歌震雷那復化魚梭梳頭白雪驚新有  
障眼玄花比舊多鄉問阻兵猶斷絕羈懷憑酒暫消磨  
不須更問今朝客門外元無雀可羅

題佛光寺

臧穀雖殊竟兩忘倚闌終日念行藏已欣境寂洗塵慮

更覺心清聞妙香孤鳥帶烟來遠樹斷雲收雨下斜陽  
人間未卜蝸牛舍遠目橫秋益自傷

次韻公才對菊見懷

髮蓬新感二毛侵尚阻清尊對菊斟久擬芝蘭同臭味  
莫疑魚鳥自高深食貧豈復甘秦炙客病空懷奏楚音  
挂席無由上牛斗漫憑流水送歸心

題滕奉使祠

本期蘇鄭共揚鑣不意芝蘭失後凋遺老祇今猶涕淚

後生無復識風標西涇雁度霜前塞潯水樵爭日暮橋  
追想平生英偉魄凌雲一笑豈能招

芭蕉

鳳翅搖寒碧虛庭暑不侵何因有恨事常抱未舒心

朱弁

字少章宋吉州團練使因通問金廷見留命以官  
託目疾固辭猝然以錐刺之而不為瞬用是得歸  
凡居雲朔二十年自號觀如居士有曲洧風月堂  
詩話行于世紹興十二年皇子生大赦宋使洪皓

張邵朱  
弁南歸

秋夜

秋夜雖漸永未抵客愁長秋月雖已圓不照寸心方將  
心貯此愁真作萬斛量惟月憐此夜誰共千里光空令  
還家夢欲超征鴻翔

北人以松皮為菜予初不知味虞侍郎分餉一小  
把因飯素授厨人與園蔬雜進珍美可喜因作  
一詩

吾老似出家晚悟魏根鈍滋古却羶葷禪悅要親近偉



哉十八公茲道亦精進舍身奉刀几割體絕嗔恨鱗皴  
老龍皮鳴齒溢芳潤流膏為伏龜千歲未須問便堪奴  
筍蕨詎肯友芝菌跣趺得一飽萬事皆可擯侍郎文懿  
後落落衆推俊澹然世味薄內典得所信香厨留淨供  
頻食不言頓宴然不語草木雷音震得法於此公骨  
髓傳心印應憐持節人餉此為問訊欲將無上味為我  
洗塵盆食之不敢餘感激在方寸

炕寢三十韻

風土南北殊習尚非一躅出鄉雖仗節入國暫同俗淹  
留歲再殘朔雪滿崖谷禦冬貂裘敝一炕且跼伏西山  
石為薪黝色驚射目方熾絕可邇將盡還自續飛飛湧  
玄雲皴皴積紅玉稍疑雷出地又似風薄木誰容鼠棲  
冰信是龍銜燭陽曦助喘息未害搖空腹惠氣生袴襦  
仍工展拳足豈惟脫膚鱗兼復平體粟負暄那用詫執  
熱定思沃收功在歲寒較德比時燠雖餘炙手焰寧有  
爛額酷矧當疑近晨炎帝獨回轂玄冥真退聽祝融端

可錄嗟予亦何者萬里歌黃鵠偃仰對窗扉妍暖謝衾  
褥壯懷羞電嬾晚悟笑突曲因思墮指人暴露苦鞭瘡  
頻年未解甲蹈此鋒刃毒遙知革輅中肝食安豆粥微  
臣將命來意懇誠亦篤有奇不能吐何術止南牧君心  
想更切臣罪何由贖此身雖自溫此志轉煩促論武貴  
止戈天必從人欲安得四海春永作蒼生福聊擬少陵  
翁秋風賦茅屋

蘇子翼送黃精酒

仙經何物堪却老較功無如太陽草龍銜雞銜名雖異  
兔公羊公事可考蘓君真是神仙裔橋井陰功貫穹昊  
雲笈書成數萬言銀闕珠宮用心早獨知此物有奇效  
福地名山為儲寶不憚林泉新劬掘斥去杵臼謝篩擣  
况從高士論麴糜更課公田收秫稻一朝靈液浮瓦盎  
三冬浩氣生襟抱且欣輒飽得澆腸謾說逆流上補腦  
眼碧那憂散黑髮白故應還翠葆賈傅只嫌松醪陋  
劉墮敢誇桑落好直須五斗論解醒寧待三杯乃通道

誰知萬里落旄人亦許匏尊自傾倒為君喚迴雪窖春  
八載羈愁供一掃

謝崔致君餉天花

三年北饌飽羶葷佳蔬頗憶南州味地菜方為九夏珍  
天花忽從五臺至崔侯胸中數千卷金甌名相傳雲裔  
愛山亦如謝康樂得此攜歸豈容易應憐使館久寂寥  
分餉明明見深意堆盤初見瑤草瘦鳴齒稍覺瓊枝脆  
樹鷄濕爛慚扣門桑蛾青黃漫趨市赤城菌子立萬釘

今日因君不知貴，乖龍耳僅免。一割沙門業，已通三世。  
偃戈息民，未有術。雖復加餐，祇增愧。雲山去此，縱不遠。  
口腹何容更相累。報君此詩，永為好捧腹。一笑萬事置。

夜雨枕上

淅淅風聲止，淒淒雨氣涼。愁工縈客思，夢故遶江鄉。書  
疏親朋少，干戈歲月長。平城弭節地，可復見秋霜。

客懷

兵氣常時見，客懷何日開。形骸病自瘦，鬢髮老相催。已

負秦庭哭終期漢節回風雷識我意一雨洗氛埃

歲序

歲序忽將晏節旄嗟未還低雲慘衆木寒雨失羣山喪  
亂關詩思謳謠發病顏夢魂識舊隱時到碧溪灣

白髮

白髮使車前烟波思渺然霜清穫稻日風急授衣天客  
館但愁坐釣舟誰醉眠乘槎會有便真到斗牛邊

有感

容貌與年改鬢毛隨意斑雁邊雲度塞鳥外日銜山仗  
節功奚在捐軀志未閒不知垂老眼何日覩龍顏

戰伐

戰伐何年定悲愁是處同黃雲縈晚塞白露下秋空魚  
躍深波月鳥啼落葉風誰知渡江夢一夜繞行宮

丙辰中秋不見月

中秋萬里月何處駕冰輪底事隔年會不憐今夕人免  
疑停杵白蟾豈避風塵默識嫦娥意承平賞更新



十七夜對月

病骨怯風露愁懷厭甲兵  
人居絕域久月向北宵明輪  
仄初經漢光分半隱城遲遲不肯下應識異鄉情

獨坐

草凍慵抽碧桃癡懶暈紅黃  
雲猶漢野紫塞漫春風使  
節空留滯侯圭未會同塔除雪不埽獨立數歸鴻

寒食

絕域年華久衰顏淚點新  
每逢寒食節頻夢故鄉春  
草

綠唯供恨花紅只笑人南軒定何日無地不風塵

上已

行行春向暮猶未見花枝晦朔中原隔風烟上已疑常  
令蘇卽在莫作楚囚悲早晚鸞旗發吾歸敢恨遲

客夜

城月四更上窗風一室幽纖雲紫雁塞重霧逼貂裘兵  
革何年息乾坤此夜愁殊鄉兩行淚騷屑灑清秋

攄抱

客滯殊方久山園絕塞深秋風入橫笛夜月傍沾襟造  
膝他時語捐軀此日心飛霜滿明鏡髮短不勝簪

重九

九日今何地寒深紫塞霜敢嫌  
廬酒濁且對菊花嘗歲  
月雙蓬鬢乾坤百戰場  
賜奠知未舉夢自識  
鵷行

送春

風烟節物眼中稀三月人猶戀  
褚衣結就客愁雲  
片段  
喚回鄉夢雨霏微  
小桃山下花初見  
弱柳沙頭絮未飛

把酒送春無別語羨君纔到便成歸

次韻劉太師苦吟之什

長城五字屹逶迤可笑偏師取出奇  
句補推敲未安處韻更熬絮益難時  
癡迷竟作禽填海辛苦真成蟻度絲  
却羨彌明攻具速劉侯謾說也能詩

善長命作歲除日立春

土牛已著勸農鞭  
葦索仍專捕鬼權  
且喜春盤兼守歲  
莫嗟臘酒易經年  
東風漸入江梅夢  
朔雪猶迷塞柳天

元會明朝定何處  
羈臣揮淚節旄前

寒食感懷次韻吳英叔

疾風甚雨老難禁  
嶺外無飭誰解吟  
雙鬢客塵諳世變  
兩眉鄉思儘愁侵  
榆錢何處迎新火  
杏粥頻年繫此心  
落日高城魂易斷  
天臨牛斗五湖深

春陰

關河迢遞繞黃沙  
慘慘陰風塞柳斜  
花帶露寒無戲蝶  
草連雲暗有藏鴉  
詩窮莫寫愁如海  
酒薄難將夢到家

絕域東風竟無事祇應催我鬢邊華

寒食

清明亦到客愁邊雙鬢星星只自憐  
兵氣尚纏巢鳳閣節旄已落牧羊天  
紙錢灰入松楸夢餽粥香隨榆柳烟  
北向雁來寒霧隔音書不比上林傳

李任道編錄濟陽公文章與僕鄙製合為一集且  
以雲館二星名之僕何人也乃使與公抗衡獨  
不慮公是非者紛紛于異日乎因作詩題于集

後俾知我心者不吾過也庚申六月丙辰江東

朱弁書

絕域山川飽所經客逢歲晚任飄零詞源未得窺三峽  
使節何容比二星蘿蔦施松慚弱質薰葭倚玉怪殊形  
齊名李杜吾安敢千載公言有汗青

濟陽公謂宇文叔通少章以死自守

恥用叔通見此故此詩以不敢齊名自託

天問絕句

穴邊酣戰君臣蟻波上羣嬉婢妾魚苦樂不同同一宇

問天此理竟何如

宇文虛中

以下天水留金通籍者

字叔通成都人宋黃門侍郎以奉使見留仕為翰林學士承旨皇統初上京諸俘人謀奉叔通為帥奪兵仗南奔事覺繫詔獄諸貴先被叔通嘲笑積不平必欲殺之乃鍛鍊所藏圖書為反具叔通歎曰死自吾分至于圖籍南來士大夫家例有之即如高待制士談圖書尤多於我家豈亦反邪有司承風旨并寘士談極刑人至今究之

和高子文秋興

沙碧平猶漲霜紅粉已多駒年驚過隙鳬影倦隨波散



步雙扶老棲身一養和羞看使者節甘荷牧人蓑

按養和兒

名事見江湖散人集  
扶老見歸去來詞

### 和九日

老畏年光短愁隨秋色來一持旌節出五見菊花開  
強忍玄猿淚聊浮綠蟻杯不堪南向望故國又叢臺

### 涇王許以酒餉龍溪老人幾月不至以詩促之

先生寂莫草玄文正要侯巴作富鄰客至但須樽有酒  
日高不怕甌生塵急催嶺外傳梅使來餉籬邊采菊人

已掃明窗供點筆為君擬賦洞庭春

按叔通別號龍溪

### 從人借琴

嶧陽慣聽鳳雛鳴瀉出冷然萬籟聲已厭笙簧非雅曲  
幸從炊爨脫餘生昭文不鼓緣何意靖節無絃且寄情  
乞與南冠囚繫客為君一奏變春榮

### 吳激

字彥高宋宰臣拭之子王履道外孫而米芾元章婿也工詩能文字畫得其婦翁筆意將命帥府以知名留之仕為翰林待制知深州到官三日而卒有東山集十卷并樂府行于世

雞林書事

箕子朝鮮僻蓬丘弱水寬儒風通百粵舊史記三韓邑  
聚居巢慣村裘披髮安猶存犬邊豆蕪用古衣冠免穎  
家工縛鮭腥俗嗜餐騎兵腰玉具府衛挾金丸長袖鳶  
窺肉都場狔挂竿琴中蔡氏弄指下祝家彈主禮分庭  
抗賓筵百拜難漬橙杭釀旨滋桂鹿脩乾滌墨松如櫛  
隕牆石似丹地偏先日出天迫衆山攢鵬翼雲帆遠羊  
腸石磴盤由來異文軌休訝變暄寒事可資談柄誰能

記筆端聊將詩貌取歸作畫圖看

歲暮江南

以下補錄二首  
故次排律之後

吳淞潮水平月上小舟橫  
旋斫四腮鱸未輸千里羹  
擣麝香不厭照筋雪無聲  
幾見秋風起空悲白髮生

長安懷古

佳氣猶能想鬱蔥  
雲間雙闕峙蒼龍  
春風十里灞陵樹  
曉月一聲長樂鐘  
小苑花開紅漠漠  
曲江波漲碧溶溶  
眼前疊嶂青如畫  
借問南山共幾峰

張斛

字德容漁陽人仕宋為武陵守後乃北歸官  
祕書省著作郎有南遊北歸等詩行于世

平安關道中

二首

高林俯青冥柯葉森若識陽光已轉午陰嶺仍半黑崢  
嶸亂石間行子有苦色臨深地勢入涉險天宇塞四顧  
無所投足繭去未息悵然增百憂冥冥羨歸翼

窮冬十日陰積雪千山路晴雲開半嶺落日猶在樹悠  
悠客心速慘慘天色暮寒鳥各有依解鞍尚無處遊魚

誤銜鈎玄豹終隱霧行行謝冠冕復我林壑趣

高寺

高寺鳴鐘後孤舟落雁邊已知歸徑晚故就上方眠石  
峻溜聲急月高松影圓明朝下烟靄迴首阻清川

訪香林老

風雨無時浪蹴天南浮舟楫信多艱半生夢破寒江月  
萬里春回故國山歸客自傷青髮改高僧長共白雲閒  
誅茅借我溪西地未厭相從水石間

# 蔡松年

字伯堅父靖宋季守燕山仕金為翰林學士伯堅行臺尚書省令史出身官至尚書右丞相鎮陽別業有蕭閒堂自號蕭閒老人薨謚文簡百年以來樂府推伯堅與吳彥高號吳蔡體有集行于世

## 淮南道中

三首

南楚二月雨淮天如漏庖畏途泥三尺車馬真鷄栖却思閒居樂雨具無所施高枕聽簷聲爐烟暈如絲

三年鎮陽遊春歸綠扶疎櫻筍媚園林日長閒枕書行復當此時涼塵暗歸篷會洗酴醾雪月波浮秘壺

鎮陽亘西南山河在圖畫花雨草烟間人家或僧舍經  
行每悵然真賞如未暇待予籃輿歸香火復蓮社

庚申閏月從師還自潁上對新月獨酌

二首

人言歸甚易但苦食不足必使極其求萬鍾不盈腹處  
世附所安無禍即無福却視高蓋車身寵神已辱

問舍前年秋已買潭西地高明鬼所瞰聊取風雨蔽瀕  
溪樹嘉木成陰十年計仍當作茅舍名之以今是

和子文寒食北潭



夢裏潭光翠欲流何時春水一虛舟  
吾廬想見扶疎樹  
宦意渾如浩蕩鷗聞道西山明酒面應無外物到眉頭  
別來誰唱驚人句十里珠簾有暮愁

雪晴呈王堂諸公

雪晴松頂玉欄斑曉眼清于化鶴山欲立凍雲搜傑句  
却思仙客退清班  
氍毹帳底沈香火  
簷蔔花中碧霧鬟  
喚取廣寒修月手月波千丈捲春還

和子丈晚望

醉眼郊原感慨生夕陽長向古今明高人法士互憎愛  
美酒空名誰重輕二頃只謀他日老五絃猶喜晚風清  
因君欲賦思歸樂安得穿雲一笛橫

韓侯晁仲許送名酒渴心生塵以詩促之

好在銀鉶秋露光借君雲夢到枯腸解澆萬里客愁破  
暫吐十年黃卷香江水苦搖梁苑夢海棠新學漢宮粧  
天東四月春如許坐待白衣投醉鄉

高士談

字子文一字季默宋韓武昭王瓊之後宣和末任  
忻州戶曹仕金為翰林直學士皇統初預宇文太  
學之禍有蒙  
城集行于世

春愁曲

壓花曉露萬珠冷金井咿啞轉纖綆寶堦寂寂苔紋深  
東風搖碎湘簾影芙蓉帳暖春眠重窗外啼鶯喚新夢  
推枕起來嬌翠顰一線沈烟困金鳳游絲飛絮俱悠颺  
慵倚繡牀春晝長郎馬不嘶芳草暗半篩急雨飛橫塘  
將赴平陽諸公祖席分韻作

灞橋波似箭南浦草如裾此夜燈前淚他年日暮雲醉  
和醒一半悲與笑相分莫作陽關疊愁多不忍聞

秋晚書懷

肅肅霜秋晚荒荒塞日斜老松經歲葉寒菊過時花天  
濶愁孤鳥江流憫斷槎有巢相喚急獨立羨歸鴉

早起

曉起先烏鵲愁多竟不眠風霜嚴塞草星月淡秋天落  
葉親攜帚垂瓶自汲泉禁門朝萬馬魂斷憶當年

風雨宿江上

風雨蕭蕭作暮寒半晴烟靄有無間殘紅一抹沈天日  
濕翠千重隔岼山短髮不羞黃葉亂寸心常羨白鷗閒  
濤聲午夜喧孤枕夢入瀟湘落木灣

祝簡

字庶夫單父人宋末登科金初倅某州仕至朝奉  
郎太常丞兼直史館有鳴鳴集行于世其詩說有  
云予政和丁酉任洺州教官是時括蒼鮑慎由欽  
止出所注杜詩說天王守太白守讀如狩于河陽  
之狩高秋登寒山南望馬邑州馬邑州在成州界  
予檢唐書志寶應元年徙馬邑州于鹽井城欽止

為有據矣舊注馬邑屬雁門于杜子美作詩處全無闕涉後人遂謂王源叔謬于牽引不知源叔初  
不注杜詩予識其孫彥朝彥朝不說杜詩非其大父注蓋彥朝不學見流俗皆讀舊注因而認有可  
嘆可歎元好問常以此問趙禮部趙云廬夫前輩必不妄試更考之嗣好問見吳彥高東山集有贈  
李東美詩引云元祐間秘閣校對黃本鄧忠臣字慎思余抑氏姨之夫今世所注杜工部詩乃慎思  
平生究竭心力而為之者鏤板家標題遂以託名王源叔翰林兩王公前後記初無一語及此注而  
後記又言如源叔之能文止作記于後則源叔不注杜詩為可見矣舉世雷同無為辨之者宣和近  
貴李東美有才藻善行書且喜作小楷所寫杜集精密適麗有足嘉賞為作古詩一篇紙尾因記鄧  
公事後人聞此其誰不疑然予少時目擊不可不識姑以告李侯非求信後人也彥高此說正與廬

夫合近歲得折本杜詩是源叔之孫祖寧所傳前  
有序備言其大父源叔未嘗注杜詩廉夫步高益  
可信矣故好問錄  
廉夫詩而併記之

舟次丹陽

船頭東下起晨鍾  
船外清霜氣暗通  
斷雁聲歸烟靄裏  
孤帆影落月明中  
隋河波浪十年急  
梁苑池臺一半空  
試問碧堤無限柳  
敗條衰葉幾秋風

下第魚臺東寺

病眼逢花亦倦開  
流鶯飛去誤相猜  
多情却愛僧堂燕

才得春風却再來

虛極齋獨坐

虛齋長缺短燈檠  
明月當窗夜氣清  
却掩塵編時閉目  
胡牀獨坐聽秋聲

夏雨

雷掣雷轟雨覆盆  
晚來枕簟頗宜人  
小溝一夜水盈尺  
便有蛙聲喧四鄰

朱之才



字斯美洛西三鄉人于汴宋崇寧間登科入齊為諫官坐直言黜為泗水令尋乞閒退寓居磁陽因而家焉昆弟數人皆有文名師美自號慶霖居士有霖堂集傳于世

南越行

南越太后邯鄲女皓齒明眸照蠻土珊瑚為帳象作牀  
錦繖高張擊銅鼓太液池內紅芙蓉自憐謫墮蠻烟中  
灞陵故人杳無耗深宮獨看南飛鴻隨兒作帝心不願  
惟願西朝柏梁殿茂陵劉郎亦可人遣郎海角來相見  
金猊夜燎龍涎香明珠火齊爭煌煌番禺秦甸隔萬里

今夕得遂雙鴛鴦白首相君佩銀印干戈欲起蕭牆釁  
莫言女子無雄心置酒宮中潛結陣漢家使者懦且柔  
纖手自欲操霜矛孤鸞竟落老梟手可憐空奮韓千秋  
樓船戈鋌師四起或出桂陽下灘水越郎追斬呂嘉頭  
九郡同歸漢天子尉陀墳草幾番青霸業猶與炎州橫  
玉璽初從真定得黃屋却為邯鄲傾五羊江連湘浦竹  
嬌魂應伴湘娥哭

後薄薄酒

薄酒可以謀醉不必霞滋玉味麤布可以禦冬不必狐貉蒙茸醜婦可以肥家不必楚女吳娃獨夫長夜商祚訖羲和酒淫素天厯李白跌宕三百五阮籍沈湎六十日眠貧吏部寡廉恥解貂常侍賸法律儻使飲薄酒未見有此失秦昭孤腋幾喪首鄭臧鵠冠貽厥咎龍裘金玦豈不哀繡衣朱襪固無取皆緣麤衣惡不御賈禍招譏亦何有夏姬滅兩國驪姬禍五世捧心顰眉亡夫差墮髻啼粧敗梁冀醜婦似可惡終不至顛沛勸君飲薄

衣麤娶醜婦此樂人間最長久

劉著

字鵬南舒州皖城人宋宣政末登進士第歸金預  
銓調碌碌州縣年六十餘始入翰林充修撰出守  
武遂終于忻州刺史皖城有玉照  
鄉既老號玉照老人示不忘本云

枕上言懷

九土將分裂中原政擾攘孰為真漢相却憶假齊王晉  
室遷神鼎梁園作戰場可憐羈客夢夜夜在家鄉

次韻王子慎玉田道中一首兼呈韓公美閣老

東晉風流屬子猷開元峭直讓韓休絲綸對掌驚三雋  
尊酒更酬失四愁古道陰陰槐樹老歸鴻杳杳荻花秋  
浩然詩思天涯遠月滿江南小謝樓

至日

亂離南國忽經年一線愁添未死前心折靈臺侯雲物  
眼看東海變桑田燕巢幕上終非計雉畜樊中政可憐  
安得絕雲行九萬却騎鯨背上青天

再和彥高

否泰由來在歲星誰聽叩角作商聲一朝漢魏成今古  
百口燕秦隔死生雉堞僅能逃病婦雁書猶記作團兄  
雪雲埋盡遼西路有酒如淮奈此情



宋元詩會卷六十一

欽定四庫全書

集部

宋元詩會卷六十二

詳校官中書<sub>臣</sub>陸 湘

主事銜<sub>臣</sub>徐以坤覆勘

總校官知縣<sub>臣</sub>繆 琪

校對官中書<sub>臣</sub>王鍾泰

謄錄監生<sub>臣</sub>張 鈞



欽定四庫全書

宋元詩會卷六十二

兵部主事陳焯編

金詩附

蔡珪

字正甫金丞相松年之子也七歲賦菊詩語意驚人日授數千言天德三年進士擢第後不赴選調求未見書讀之其辨博為天下第一歷澄州軍事判官三河溥正隆三年銅禁行官得三代以來鼎鐘彝器無慮千數禮部官以正甫博物且識古今奇字辟為編類官丁父憂起復翰林修撰同知制

語改戶部員外郎太常丞北廷稽古禮文之事取其議論為多大定十四年由禮部郎中出守濰州

道卒

### 感寓

九官名世人制作歸一夔達樂不達禮漢儒言足嗤古人寓意耳結麓持鋌鉞俗子未易識絕藝聊相推坐令編簡門亦以專門奇堂堂張長史楷妙世莫知謂予言

不信願視郎官碑

奇疑作期

### 霽川道中

扇底無殘暑西風日夕佳雲山藏客路烟樹記人家小  
渡一聲櫓斷霞千點鴉詩成鞍馬上不覺在天涯

出居庸

亂石妨車轂深沙困馬蹄天分斗南北人問日東西側  
腳柴荆短平頭土舍低山花兩三樹笑殺武陵溪

秋日和张温中韻

琴裏忘憂盡日彈百憂俱息夜初闌青燈把卷逢真味  
綠酒傾尊破薄寒月色半留梧影上露華應到菊花團

在家須信貧猶好夢想人間行路難

### 馬定國

字子卿荏平人唐中令馬周之裔孫少日志趣不凡宣政末題詩酒家壁有蘇黃不作文章伯童蔡翻為社稷臣之句用是得罪亦用是得名阜昌初遊歷下亭以詩撼齊王豫豫召與語大悅授監察御史仕至翰林學士石鼓自唐以來無定論子卿以字畫考之云是宇文周時所造作辯萬餘言出入傳記引據甚明學者比蔡正甫燕王墓辯其初學詩未有入處夢父與方寸白筆從是文章大進自號薺堂先生有集傳於世

### 雨晴離開化寺

澗谷流秋水樓臺入暮寒連城遭雨積一日得泥乾利  
劍青蠶室名駒白鐵鞍回頭棲隱地風樹響珊珊

送王松年之汶上

去去東平道飛轅不可攀地鄰邾子國天近穆陵關問  
俗徵前事移家卜好山溪堂醉花月春興幾時還

清平道中

棘林苦荳野花黃一馬駸駸渡溧陽別墅酒旗依古柳  
點溪花片落新香伏波事業空歸漢都護田園不記唐

今日清明過寒食又將書劍客他鄉

登歷下亭有感

男子當為四海遊又攜書劍客東州  
烟橫北渚芰荷晚木落南山鴻雁秋  
富國桑麻連魯甸用兵形勢接營丘  
傷哉不見桓公業千古遶城空水流

招康元質

此生一著定如何不傍田疇即釣蓑  
北阜平蕪隨鳥遠東湖新漲與天多  
詩成重墨題飛葉睡起輕芒踏軟沙

猶有客愁銷不盡風軒茶竈待君過

題崇子中菴

羨君高節似陶潛五畝園林老不添  
遜世人情雖淡薄  
開門秋色自清嚴  
案頭黃卷香終日  
砌下蒼苔雨一簷  
後夜中秋更應好  
隔窗雲木看飛蟾

香嚴病中

九州四海盡行路  
萬戶千門非我家  
金彈不徒驚燕雀  
春雷終待起龍蛇

郢州城西

秋江白水浪花麤  
墟落人歸鳥自呼  
新月高城三百雉  
角聲吹徹小單于

宣政末所作

二首

蘇黃不作文章伯  
童蔡翻為社稷臣  
三十年來無定論  
到頭姦黨是何人

山杏山桃取次開  
紅紅白白上樓臺  
移將海底珊瑚樹  
乞與人家也不栽



張子羽

字叔翔東阿人馬定國薺堂集載其師友六人叔翔亦其一也定國謂叔翔于文章無所不能嘗仕金官洛陽云

壽張和滑益之

理髮秋庭起夕陽靜中誰可共傳觴雲橫故國三年別  
水遶孤村六月涼病眼只貪書味永渴心頻夢橘奴香  
魚山早有終焉計少日應容解印章

朱自牧

字好謙，棣州厭次人。於皇統年間，南選宋端卿榜。登科，大定初，以同知晉寧軍事卒。官有詩云：「寒天展碧供飛鳥，落日留紅與斷霞。」又云：「水禽孤影白，霜果半腮紅。」海氣升孤月，巖安起暝烟。山雪尋崖斷，林烟逐樹低。燈殘星在壁，霜重水漫食。句法之工，類如此。

### 訪山寺僧

踏破蒼苔叩竹扃，晚晴夜院有餘清。  
幡腰落日紅千甌，簷際遙岑翠一橫。  
種秫公田聊卒歲，栽蓮僧社擬投名。  
從今興熟頻來往，未信齋鐘午後鳴。

謝吳堡知寨安巨濟贈紙百幅

百幅溪牋遠見羞故人佳餉若為酬幸將晚節收魚網  
未得良工起鳳樓柿葉學書差足慰芸香辟蠹會須求  
揮毫不見雲烟落愚賈操金愧暗投

晚泊濟陽

江北秋陰一半晴晚涼留與客襟清水邊畫角孤城暮  
雲底殘陽遠樹明旅鴈為誰來有信斷蓬如我去無程  
寥寥天地孰知己村酒悠然只獨傾

郊行

緩轡尋春水一涯最憐朝雨浥輕沙小溪烟重偏宜柳  
平野雲垂不礙花青眼步兵元好酒黑頭江令未還家  
興長不覺歸來晚過盡城頭陣陣鴉

劉汲

字伯深南山翁之子天德三年進士釋褐慶州軍  
事判官入翰林為供奉自號西巖老人有西巖集  
傳于家

題西巖

人愛名與利我愛水與山人樂紛而競我樂靜而閒所

以西岳地千古無人看  
雖看亦不愛  
雖賞亦不歡  
欣然會予心  
卜築於其間  
有峰極峭屹  
有泉極清寒  
流觴與被楔  
終日堪盤桓  
此樂為我設  
信哉居之安

劉瞻

字巖老  
亳州人  
天德三年南榜登科  
大定初召為史館編修  
卒官

春郊

桑芽粒粒破春青  
小葉迎風未展成  
寒食歸寧紅袖女  
外家紙上看蠶生

所見

傾欹石片插連漪上有蕭蕭楊柳枝藻荇半浮苔半濕  
浣紗人去不多時

郝俟

字子玉太原人正隆二年進士仕至河東北路轉  
運使子居簡字仲寬進士不第有詩名太原平陽  
間居中字仲純樞密院令史出身嘗刺坊州  
人物楚楚所謂文獻不足猶超人羣者也

蝸室

草草生涯付短椽身隨到處即安然功名角上無多地

風月壺中自一天世路久諳甘縮首麴車才值便流涎  
一生笑我林鳩拙辛苦營巢二十年

奉陪太守遊南湖同郭令賦

翠幄千章蔭晚空年華心賞兩無窮雲頭欲落催詩雨  
池面微生解愠風經筵使君談似綺僊舟令尹飲如虹  
娜隅自適清池樂不信參軍是郝隆

寺樓晴望

詰曲闌干面翠微  
魚龍窗戶溢清暉  
雨侵斜日明邊過

雲壘山前缺處歸多病過春猶止酒薄寒向晚却添衣  
宦名不負滄波願羞見陂田白鳥飛

任詢

字君謨易州軍市人父貴有才幹善畫喜談兵以  
宣政間遊江浙君謨生於處州為人慷慨多大節  
書法為當時第一畫亦入妙品評者謂畫高于書  
書高于詩詩高于文然王內翰子端獨以其才具  
許之君謨正隆二年進士歷省掾大名總幕益都  
都司判官北京鹽使課殿降州佐時無借力者故  
連蹇不進六十四致仕優游鄉里家所藏法書名  
畫數百軸日夕展玩不知老之將至年七十卒

西湖



西湖環武林澄澄大圓鏡仰看湖上寺即是鏡中影湖  
光與天色一碧千萬頃堤徑截烟來樓臺自昏暝

庚辰十二月十九日雪

馮夷剪水翻銀璣北風浩浩如兵威瓊臺玉樹壓金碧  
三十六宮明月輝五更待漏雞人唱近衛臚傳九天上  
須臾龍馭踏飛瑤萬戶千門寂相向皓齒才人宮袖窄  
巧畫長眉梅半額含嚬一笑競春妍繡勒錦韉生羽翮  
城外雪深迴馬首別殿傳觴燈作晝歡聲一曲借春謠

半夜西園滿花柳霑濡已見盈阡陌況是隆冬見三白  
帝力如天人得知今慶明年好春澤

馮子翼

字士美大定人正隆二年進士性剛果與物多忤  
用是仕宦不進以同知臨海軍節度使事致仕居  
真定有詩樂府傳于世

三月七日登龍尾山寺

古寺尋龍尾山城送馬蹄花濃香膈膈泉瑩冷玻璃寒  
食春無幾催歸日欲西春風吹病眼烟樹遠淒迷

佑德觀試經

林館清深小雪殘  
釀梅天氣不多寒  
客窗竟日無人到  
只有蕭蕭竹數竿

邊元鼎

字德舉豐州人兄元勳元恕俱有時名號三邊德  
舉十歲能詩天德三年第進士以事停銓世宗即  
位張太師浩表薦供奉翰林出為  
邢州幕官復坐誣累遂不復仕

帝城

帝城回想夢魂中  
秋月春花在處同  
朱雀橋邊三月草

鳳皇樓上四更風錦囊別後吟箋少玉笛閒來酒釀空  
贏得當時舊標格九分憔悴入青銅

新香

新香終比舊香濃只是相逢久不容繡被瞥同巫峽夢  
銀鞍多負景陽鐘寶檀烟斷閒金獸玉鎖聲傳惱睡龍  
簾影漸分風又起一塘秋水落芙蓉

閒題

十年一夢到灰心歸鬢吳霜漸欲侵物外少逢稀有鳥

冶中仍作不祥金  
閒雲閣雨終何事  
枯木因風亦自吟  
却歎淵明非達道  
無絃猶是未忘琴

偶見二首

牛女佳期歲一過  
都緣迢遞隔金河  
可憐馬上香車畔  
只隔珠簾更不多

輕蓮素質澹蕭蕭  
葉密溪深未可招  
雨暗蘭舟人去後  
却容白鷺逞風標

李晏

字致美高平人唐順宗第十六子福王綰之苗裔也父森字彥實工于詩致美皇統二年經義進士釋褐臨汾丞時張太師浩判河陽一見愛其才為之延譽稍遷遼陽幕官與興陵有藩邸之舊入翰林為學士高文大冊號稱獨步拜御史中丞明昌初為禮部尚書分詣道府試復經義設經童科皆自致美發之

贈燕

王謝堂前燕秋風又送歸  
向人如惜別入戶更低飛  
海濶迷烟島樓高近落暉  
不知從此去幾日到烏衣

高麗平州中和館後草亭

藤花滿地香仍在松影拂雲寒不收山鳥似嫌遊客到  
一聲啼破小亭幽

王寂

字元老薊州玉田人系出三槐父礎字鎮之國初  
名士仕至歸德府判官元老天德三年進士興陵  
朝以文章事業顯終于中都路轉運使壽  
六十七諡文肅有拙軒集北遷錄傳于世

送張仲謀使三韓

照海旌幢出樂浪過家上冢路生光鴨江桃葉朝迎渡  
崑嶺松花夜煮湯恩詔肅將芝檢重醉鞭低裊玉鞘長

遺民笑指天車道酷似南陽異姓王

高麗稱中原使節皆曰天車某官事

見閩子秀  
鴨江行記

奉題少保張公曲阿別墅

鍾湖亭下水淙淙綠野平原未易雙  
十里藕花紅步幃  
一軒松蔭碧油幢  
洛中獨樂有司馬  
天下不名知曲江  
紙尾欲煩賢宅相  
雨蓑添我坐蓬窗

劉仲尹

字致君益州人後遷沃州正隆二年登進士第以  
潞州節度副使召為都水監丞卒致君家世豪侈



而能折節讀書詩樂府俱極蘊藉有龍山集嘗  
於其外孫欽叔處見之參洛翁而得法者也

### 秋盡

利祿蝸涎壁年華蟻夢槐秋隨庭樹老寒逐雁聲來養  
性論三適分愁咏七哀閉門人客少書籍遶牀堆

### 墨梅 二首

瘦損昭陽鏡裏春漢家公主奉烏孫淚痕滴盡宮廬月  
誰道神香解返魂

生憎施粉與施朱換骨玄都亦自殊疎影冷香題不到

夢驚烟雨暗西湖

劉迎

字無黨東萊人初以蔭試部掾於大定十三年用  
薦書對策為當時第一明年登進士第除幽王府  
記室改太子司經顯宗特親重之二十年從駕涼  
陁以疾卒章宗即位錄舊學之勞賜其子國樞進  
士第無黨自號無諍居士有詩文  
樂府號山林長語詔國學刊行

河防行

南州一雨六十日所至川原皆汎溢黃河適及秋水時  
夜來決破陳河堤河神憑陵雨師借晚未及晴昏復下

傳聞一百五十村蕩盡田園及廬舍我聞禹時播河為  
九河一河既滿還之他川平地迴勢隨弱安流是以無  
驚波祇今茫茫餘故迹未易區區議疏闢三山橋壞勢  
益南所過泥沙若山積大梁今世為陪京財賦百萬資  
甲兵高談泥古不須爾且要築堤三百里鄭為頭汴為  
尾準備他時漲河水

雲中君圖

衣若新沐蘭湯薰靈巫拜舞方迎神恍然相見帝者服

九歌昔咏雲中君畫史亦可入妙入造化域羽衣玉塵  
美且閑此意不知何處得空明倏忽紛漠濛胡為眷眷  
臨壽宮飄然來下復遠舉想像決去隨飛龍祠空人散  
秋蕭瑟落日猿聲喚秋色湘天極目青茫茫憑高一望  
無南北

梁忠信平遠山水

憶昔西遊大梁苑玉堂門閉花陰晚壁間曾見郭熙畫  
江南秋山小平遠別來南北今十年塵埃滿目不見山

烏靴席帽動千里只慣馬蹄車轍間明窗短幅來何處  
亂點依稀澆寒具煥然神明頓還我似向白玉堂中住  
濛濛烟靄樹老蒼上方樓閣山夕陽一千頃碧照秋色  
三十六峰凝曉光

題十眉圖

寶箱拂塵金鋸膝周昉丹青見真筆春風曾解賦妖嬈  
人共畫圖成十一燭奴香底花光凝錚錚鐵響聞三更  
車聲雷動不通語眼態波橫空送情蠻雲盤鶴遼天濶

犀玉依依對書札人生何處不相逢還醉武陵溪上月  
沙漫漫

沙漫漫草斑斑南山北山相對看我行乃在山之間行  
人仰不見飛鳥樹木足知邊塞少沙漫漫草斑斑我行  
欲起西風還僕夫汝莫愁衣單我但著衣思汝寒

車轆轤

馬虺隤牛齧棘山行縈紆車轆轤路傍指點是官人老  
矣一翁雙鬢秃汝牛幸可耕汝馬幸可騎有此可載琴

書歸胡為奔走東西道白髮刁騷被人笑

海上

潮戲三山島烟橫萬里沙蜃樓春作市鼉鼓暮催衙一  
曲水僊操片帆漁父家安期定何處試問棗如瓜

秋郊

秋水四五尺暮山三兩峰浮雲白毫相落日紫金容衰  
笠前村笛樓臺古寺鐘殷勤小平遠圖畫憶渠侬

代人憶舊

緩步素絲障微吟紫綺裘醉便風側帽歌愛月明樓屏  
軸題春恨銅荷滴夜愁風流十年夢燈火漫揚州

彥美生朝

壯日里閭俠臂彎雙角弓繡韉紅匝匝貂袖紫蒙茸雲  
態自蒼狗玉輝猶白虹為君占壽骨綽起有清風

寄題安巖起官舍北溟

一軒高占鳳麟洲要作人間汗漫遊海國風烟自朝暮  
洞天日月幾春秋夢魂欲拂三花樹生計聊隨一葉舟



待我丹成訪君去  
閨風佳處卜菟裘

和人七夕韻

今古良宵此會同  
望穿雲物有無中  
人間鉤合三山隔  
天上靈槎一水通  
鵲樓空紈扇月  
鴛鴦機冷葦蘿風  
不須更乞蛛絲巧  
久矣人生百巧窮

代王簿上梁孟容副公

二首

妙年椽筆賦長楊  
一日聲名滿四方  
天上風流青瑣客  
人間嘉慶綠衣郎  
錦囊看讀金花誥  
畫戟閒凝燕寝香

預恐政成趨急詔海沂無計駐王祥

自笑微官馬骨高十年霜鬢雪刁騷長林豐草未適性  
尖帽短鞵安得豪名宦真同一鷄肋簿書空束兩牛腰  
故園清興湖山裏歸去經營一把茅

清明前十日作

雨餘天氣動朝寒寒食都來數日間羯鼓催開小桃李  
畫屏圍出好溪山塵埃老我真堪笑風物撩人欲破慳  
梅雪已殘春過半一樽何處與公閒

會客普照繼呈此詩去及瓜不數日矣

室中呼起散花天來伴維摩到處禪百刻篆香消晝永  
一番花雨破春妍雲山真欲追聲叟風腋何妨借玉川  
他日相思共明月舊遊應說禁烟前

觀古作者梅詩戲成一章

翠袖佳人脩竹傍風姿倬約破湖光靜中慣識形神影  
妙處誰知色味香觀想有靈通水月孤音無伴挾冰霜  
故人愁絕今何許烟雨霏霏子半黃

聞彥美服藥以詩問訊

耳邊塵事且無喧聽我歸耕郭外村  
賤子自藏蝸殼舍故人誰並雀羅門  
書窗共作三年計樽酒相逢一笑溫  
不信家山不堪隱仇池今在古銅盆

次劉元直韻

二首

一秋何事憶歸頻正以家無姑婦津  
未許桂枝招隱士不妨桃葉贈行人  
夢魂歷歷家山遠客宦悠悠五斗貧  
犀箸鸞刀許何日歸來舉案得紛綸

半年歸夢別離間只有音書雁足還  
羅幕翠橫秋掩冉  
玉壺紅濕淚攔斑  
天明不作霧非霧  
月破可憐山復山  
準擬春風對眉嫵  
一樽相對洗愁顏

和曹次仲韻因以自感

自笑區區學道難  
未容香火訪名山  
因循憂患餘生裏  
收斂光芒窘步間  
白社祝公今日始  
丹丘容我幾時還  
相從願結翻經會  
共過壺中日月閒

陪諸友登三山亭

半濠清淺芰荷凋落日登臨未寂寥山色逼秋渾作市  
海聲迎暮欲吞潮沙頭白鳥疑相熟木末青旗苦見招  
不似常時對官府可無閒話及漁樵

題歸去來圖

筆端奇處發天藏事遠懷人涕泗滂餘子風流追魏晉  
上人談笑自羲皇折腰五斗幾錢直去國十年三徑荒  
安得一堂重寫照為公桂酒瀉蕉黃

昌邑道中

屋角鷄號夜向晨客牀相對話悲辛  
流離僅脫噲等伍老大空為濟上人  
却掃欲安無事貴累人猶說立錫貧  
故山鄰里令安否歸去同尋筍蕨春

寄題孔德通東園

花木陰陰一畝宮平生高興與誰同  
樽罍北海無虛日鄉里東家有故風  
先業固知衣鉢在大門應惜橐籥空  
襄陽耆舊令誰識尚喜風流見阿戎

題仲山枝巢

鏡中青鬢入霜皤歲月從交落魄過物理不容人過分  
生涯休歎我無多百年竟似蠅鑽紙萬事終同鼠飲河  
祇恐徐公宿緣在東風時夢海棠窠

梅

誰道江梅驛信遲碧琅玕裏見橫枝為尋疎影暗香處  
獨立嫩寒清曉時嚼蘂不妨浮白飲認桃休賦比紅詩  
平生東閣風流在何遜而今鬢欲絲

城南菴



故鄉歸思白雲邊  
鉞東來想浩然  
桑下久無三宿戀  
室中今許一燈傳  
夢驚城郭風塵窟  
興寄湖山雪月船  
老矣重遊恐難得  
平生四海與彌天

寄題蘄丘僧房

道人休去白雲邊  
老矣分明懶瓚然  
參學誰能知許事  
退休聊得息諸緣  
忘形馬跡車塵外  
適意山光水影前  
想得松根憩寂寞  
壞殘雲衲半垂肩

聞丘丈晚集慶壽作詩戲之

桃李欲開風雨多  
花時猶得屢經過  
緩聽一曲玉連瑣  
滿汎十分金卷荷  
紅燭影紗聞喚馬  
翠羅承轡見凌波  
杜陵老矣孤春事  
奈此詩愁惱亂何

河橋

桃李香中八九家  
青旗高挂綠楊斜  
晚來風色渡頭急  
滿地蕭蕭楊白花

過關渡水圖

短車無復駕青牛  
散策方來對白鷗  
烟水從容許君獨

暫須分我一船秋

歸來圖戲作

雲髻春風一尺高  
笑攜兒女候歸橈  
須知一首閒情賦  
合為微官懶折腰

党懷英

字世傑宋太尉党進之十一代孫也父純睦自馮翊來以從仕郎為泰安軍錄事參軍卒官妻子不能歸遂為奉符人懷英之在孕也母夫人夢道士吳筠來託宿及公生儀觀秀整如神僊然少穎悟日授千餘言師亳州劉巖老濟南辛幼安其同舍生也嘗試東府取解魁是後困于名場遂不以世

務嬰懷放浪山水間詩酒自娛簞瓢屢空宴如也  
夫人石氏徂徠先生之後亦能安貧守分既久鄉  
豪傑有知公者稍料理之大定十年擢進士甲科  
調成陽軍事判官汝陰令入為史館編修應奉翰  
林學士出為大定軍節度使為政寬簡不言而人  
化召為翰林學士承旨大安三年九月年七十八  
終于家諡曰文獻

瓊花木后土像

皇媧化萬象賦受無奇偏胡為墮愛境亦為尤物牽煌  
煌靈祠花玉藥冠春妍婉如傾國姝獨立江湖邊顧惜  
怨奪移含秀梁宮烟青黃竟自冠始信擁腫全珍材歸

好事肌理緻且堅琢刻方寸餘遺像規汾孺願言稅靈  
馭要復安所憐神遊妙難詰豈以大小懸槐根開夢國  
橘實遊碁僊靜想寶龕中坐納東南天況有大者存指  
顧超八埏

西湖晚菊

重湖滙城曲佳菊被水涯高寒逼素秋無人自芳菲祥  
飈散幽馥晴露墮餘滋蹊荒綠苔合采采歎後時古餅  
貯清北芳樽消塵霏遠懷淵明賢獨往誰與期裊回東

離月歲晏有餘悲

西湖芙蓉

林颺振危柯野露委荒蔓孤芳為誰妍一笑聊自獻明  
妝炫朝麗醉態羞晚困脈脈懷春情悄悄驚秋怨豈無

桃李媒不嫁惜嬋媛悠哉清霜暮共抱蘭菊恨

晚菊芙蓉詩未

見風致而遺山極賞併舉王子端獄中賦  
壹作追配柳州芍藥東坡長春母乃過乎

趙飛燕寫真

昭陽宮裏千蛾眉中有一人輕欲飛姊妹當緣恃新寵

六宮鉛粉無光輝  
春回太液花如繡  
花底輕風扶翠袖  
君恩不許作飛僊  
襤積宮裙留淺皺  
君王貪宴溫柔鄉  
掖門不省搖倉琅  
避風臺成略今古  
空使遺妒驚霓裳  
當年傾城復傾國  
誰寫餘妍入丹碧  
背燈擁髻一潛然  
不應尚有樊通德

楚清之畫樂天小娃撐小艇  
偷採白蓮回不解藏  
蹤跡浮萍一道開  
詩因題其後

樂天歸臥湖山邊  
閒買池塘娛暮年  
小蠻已老樵素去

心地玲瓏如白蓮室中誰遣散花女故點禪衣香破禪  
鴛鴦為報竊花處題詩要戲小嬋娟紅妝秋水照明蠲  
清之粉本清且妍道人無心被花惱對畫作詩真適然  
君不見元亮投名蓮社裏不妨更賦閒情篇

王庭筠

字子端熊岳人父名遵古字仲元以正隆五年進  
士仕為翰林直學士才行兼備道陵所謂昔人君  
子者也子端早有重名大定十六年甲科文采風  
流照映一時歷州縣用薦得供奉翰林承安中為  
言事者所累謫州幕府未  
幾復應奉稍遷修撰卒



獄中賦萱

沙麓百戰場烏鹵不敏樹况復幽圜中萬古結愁霧寸  
根不擇地于此生意具婆娑綠雲杪金鳳掣未去晚雨  
沾濡之向我泣如訴忘憂定謾說相對清淚雨

舍利塢

蒼山亭亭如覆盃佛塔東西屹相向林頭朝日射重檐  
黃金丹砂踰生光中華此塔第十五圖記所傳知不妄  
智慧薰成舍利羅夜半奇芒時一放想見當時阿育王

麾叱神工鞭鬼匠雲車瘴海挽炎沙沙底黃腸三萬丈  
石排方面蔑石段鐵錮瘦中腰鼓樣工夫精密業長久  
位置尊嚴氣高張地皮浮水膚寸許旱溢與之俱下上  
崧山歸山夏秋雨雨潦從衡歲相盪天龍圍護夜叉守  
終劫不敢生波浪塔前樹秀老不死樹下水流多益壯  
再拜初嘗一勺甘洗我三生煩惱障

銅雀瓦歌

哀輔之得鄴城注雨瓦筒用以支琴予因作詩紀之

鄴城城南青雀來五樓突兀有三臺胡桃萬瓦淨如水  
春陰不敢生莓苔檐雨闌干三百尺多年雨蓄空堦石  
繁華已逐水東流斷臂時從耕者得可憐此物得君手  
愛之不啻連城璧錫花如雪錯髮華小字興和猶可識  
晴窗拂拭支桐君上下一般蛇蚶文哀彈遽止不成弄  
千古愁聲誰忍聞

送士選山東外臺判官

秋天寥廓使星明光動山東七十城玉署文章厭閒冷

繡衣風采試澄清人隨白鴈霜前到詩遶青山馬上成  
才力如君君未老只愁無地避功名

韓陵道中

石頭瑩确兩坡間不記秋來幾往還日暮蹇驢鞭不動  
天教仔細數前山

黃華山四絕句

帝遣名山護此邦千家瑟瑟嵌西窗山僧乞與山前地  
招客先開四十雙

王母祠東古佛堂人傳檐宇自隋皇年深寺廢無僧住  
滿谷西風栗葉黃

手拄一條青竹杖真成日挂百錢遊夕陽欲下山更好  
深林無人不可留

挂鏡臺前挂玉龍半山飛雪舞天風寒雲直上三千尺  
人道高歡避暑宮

### 趙秉文

字周臣滄陽人閒閒其自號也幼穎悟讀書若夙  
習大定二十五年進士應奉翰林文字坐譏訕免

官未幾起為同知岢嵐軍州事轉北京路轉運司  
度支判官承安五年冬十月陰晦連日宰相萬公  
入對上顧謂萬公曰卿昨言天日晦冥亦猶人君  
用人邪正不分者極有理趙秉文曩以言事降授  
聞其人有才藻工書翰又且敢言朕非棄不用以  
北邊軍興姑試之耳泰和二年改戶部主事翰林  
修撰出為寧邊州刺史二年改平定州治化清淨  
所去人思之貞祐初國中仍歲被兵公建言時事  
可行者三一遷都二導河三封建廷議略施行之  
四年除翰林侍講學士明年轉侍讀興定中拜禮  
部尚書兼侍讀同修國史知集賢院開興正月京  
師戒嚴時公已老日以時事為憂雖食息頃不能  
忘每聞一事可便民一士可擢用大則拜章小則  
為當路者言殷勤鄭重不能自己竟用是得疾薨  
年四十七

雜詠

猗猗南山竹並生凡卉叢歲晏多霜雪見別蕭艾中我  
欲食鷄雛千歲不一逢留之和律呂截作嶰谷筒一變  
為清商日暮來悲風清泉溉石根上有白雲封虛心抱  
靜節知音為誰容不如歸去來一竿釣清澧

和陶淵明擬古

四首

小智多自私大方乃無隅一毫納萬象萬象非卷舒日  
月為我牖天地為我廬曲士窘拘囚一身無容居我夢

登日觀青天入平蕪俯視但一氣二豪彼何如

昔日穆天子侈心窮八荒崑崙入馬蹄遽廬視明堂王  
母為之謠白雲何茫茫憑高俯九州塊如螻蟻場歸來  
越河關萬象壓崑崙遂令學僊者聞風為激昂漢武千  
秋露淮南八公方至今瑤池宴空為後代傷

吾道無緇磷萬古常如茲奈何中智下謂彼不知時與  
世頗殊好譬彼澠與淄我欲質所從登高望九疑路逢  
古漁父長歌滄浪辭出門異所見退坐還自思當時固



殊古古人不我欺翩翩出林鳥日暮將何之倚檐送歸  
盡聊欲絃吾詩

西北有佳人樓上拊雲和一鼓別鶴操再美求凰歌絃  
聲幾欲絕哀響何其多昔為掌中珍今為路傍花壯年  
不再得華落將如何

和陶飲酒

三首

鷲鳥閉籠中舉翮觸四隅騏驎駕鹽車跼蹐困中途雖  
然遭識拔未免為人驅傍觀信美矣自愧良有餘不如

兩無累還我田園居

幽居淡無事雅志了玄經  
眼花憎文字悠悠竟無成  
中夜起不寐披衣守寒更  
梅竹散清影素月流廣庭  
孤鶴閑逸響切切寒蟲鳴  
拊卷長歎息慷慨惻中情

漢儒傳注學未為世所得  
秦火少完書豈免烏焉惑  
後儒補罅漏聖道少開塞  
俗士喜持戈又一秦相國  
且共歡一觴多言不如默

白雁

波淨影逾白，霜清鳴更哀。  
乾坤雙鬢老，風雪一聲來。  
林迴隱猶見，天長去復回。  
物情嫌太潔，莫使羽毛摧。

寄王學士子端

寄語雪溪王處士，年來多病復何如。  
浮雲世態紛紛變，秋草人情日日疎。  
李白一杯人影月，鄭虔三絕畫詩書。  
情知不得文章力，乞與黃華作隱居。

靈感寺

徒河岸北白蓮東，法鼓驚飛碣石鴻。  
塔上風烟高鳥路，

山頭雲雨化人宮  
松林礙日蜂房冷  
石砌頽沙蟻穴空  
欲盡休公揮麈樂  
鬢絲羞對落花風

謁北嶽

四大坤儀一羣山  
太茂尊奠方荒冀  
宅視禮配天孫西  
送虞淵暮東瞻碣  
石瞰寶符臨代郡  
鐵甕扼并門控趙  
襟形壯包燕氣象  
渾九河探禹跡萬  
里叫虞魂在昔登  
封始前驅羽衛繁  
千家駢部曲萬騎  
隘山樊卜地恒陽  
曲移祠泰始元

晉移祠  
曲陽

荒碑刊歲月飛石碣乾坤帝秩

加黃屋宮居象紫垣雲楣朽芝瑞雨砌裂槐根聖錄長  
桑洞僊巖張果村卜居如可近重整北山轅

春遊

無數飛花送小舟蜻蜓款立釣絲頭一溪春水關何事  
皺作風前萬疊愁

暮歸

貪看孤鳥入重雲不覺青林雨氣昏行過斷橋沙路黑  
忽從電影得前村

周 昂

字德卿真定人父伯祿字天錫師事玄真先生褚  
承亮大定初第進士仕至同知沁南軍節度使事  
德卿年二十一擢第釋褐南和簿有異政遷良鄉  
令入拜監察御史為人所擠竟坐詩得罪謫東海  
上十數年始入翰林言事愈切出佐三司非所好  
從宗室承裕軍承裕失利跳走上谷衆欲逕歸德  
卿獨不可城陷與其從子嗣明同死于難按褚  
承亮字茂先宋宣和六年登第金兵破真定拘境  
內進士試策獨承亮長  
揖而出帥府甚重之

曉望

曉樹雲重隱春城日半陰蒼茫塵土眼恍惚歲時心流

落隨南北才華閱古今  
柴荆生事寧憶二疏金

雨過

雨映高檐過山開晚日明  
動雲方潰擁號水未休爭沙  
岸龜鼉出荒庭鶴鶴行  
草泥沾屐齒搯策有餘清

晚步

鬱鬱孤城隘飄飄絕塞遊  
短衣忘遠步高興會清秋  
白水深樵谷黃雲古戍樓  
居人半裘毯橫管暮生愁

秋夜

高閣鐘初殷層城月未光  
淨空含宇大臥斗帶星長  
暗覺巢鳥動清聞露菊香  
誰家砧杵急應怯暮天涼

宿西藍

聞道西藍好能來定有緣  
青山避喬木流水信平田  
步屨迷深竹題詩惜暮烟  
塵心厭翻倒一室暫安禪

夜步

擊柝隣居靜開門宿鳥驚  
西風秋半急北斗夜深明  
獨立乾坤大徐行杖履輕  
遙憐漢宮闕重露濕金甃



望山中松

地險蟠根古人稀  
小徑消雨皺開白雪風響入青霄未  
畏斧斤逼惟愁霹靂燒解鞍那避遠冷色故相招

翠屏口

四首

去歲翠屏下東流看湧波愁將新鬢髮還對舊關河健  
翻翻秋隼峰高并晚駝草深饒虎跡夜黑欲誰過  
地擁河山壯營闕劍甲重馬牛來細路燈火出寒松刁  
斗方嚴夜羔裘欲禦冬可憐天設險不入漢提封

玉帳初鳴鼓金鞍半偃弓傷心看塞水對面隔炎風山  
去何時斷雲來本自通不須驚異域曾在版圖中

萬里來崩豁終年氣慘悽地窮青澗斷天近玉繩低勃  
窟黃沙北崑崙白雪西故園何處覓搔首意空迷

新秋

畏日經時暑清秋一夕涼真堪近燈火不復病衣裳宋  
玉悲搖落安仁愧老蒼鄙夫那及此睡美百憂忘

家園

五畝園連竹三間屋向陽氣和春浩蕩心靜日舒長  
花鳥成相識琴書付兩忘陶然一尊酒誰復記羲皇

香山

山林朝市兩茫然紅葉黃花自一川野水起人如有約  
長松閱世不知年千篇未暇償詩債一飯聊從結淨緣  
欲問安心心已了手書誰識是生前

宋文貞公廟

開元四荒不動塵柱石中原有老臣襄土一丘松栢暗

長安三日荔枝新

讀陳後山詩

子美神功接混茫人間無路可升堂一斑管內時時見  
賺得陳郎兩鬢蒼

趙 颯

字文孺第進士明昌末終于禮部郎中性冲澹學  
道有得黃山其自號也閒閒趙公云黃山正書體  
兼顏蘇行草備諸家體超放處又似楊凝式當在  
黃魯直蘇才翁伯仲間党承旨篆陽冰以來一人  
而已而以黃山配之至今人  
謂之党趙有黃山集行於世

澗上

遠逕留殘照疎林出小園山川半豺虎歲月且琴尊杜  
老新雞柵龐公舊鹿門不才真忝竊人道典刑存

中秋應制

秋氣平分月正明藥珠宮闕對蓬瀛已驅急雨消殘暑  
不遣微雲點太清簾外清風飄桂子夜深涼露滴金莖

聖朝不奏霓裳曲四海謳歌即樂聲

史舜元嘗從文孺學詩說道陵中秋

賞月瑤光樓召文孺對御賦詩以清字為韻道陵讀至落句大加賞異手酌金鍾以賜且字之曰文孺以此鍾

卷六十二  
賜汝作酒直士林榮之漢高祖言吾不  
如子房君父字呼臣下不為無故事也

### 黃山道中

小穀城荒路屈蟠石根寒碧漲秋灣千章木秀黃公廟  
一點雲飛白堦山好景落誰詩句裏蹇驢駝我畫圖間  
膏肓泉石真吾事莫厭乘閒數往還

### 晚宿山寺

松門明月佛前燈菴在孤雲最上層犬吠一山秋意靜  
敲門時有夜歸僧

過修縣董大夫廟

漢朝原不用真儒  
宣信忠言益帝圖  
賈誼長沙鼃錯死  
未須獨恨老江都

劉昂

字之昂興州人大定十九年進士曾高而下以科  
名相踵者七世矣昂天資警悟律賦自成一家輕  
便巧麗為場屋捷法作詩得晚唐體尤工絕句張  
泰娥者頗能小詩其賦遠山云秋水一抹碧殘霞  
幾縷紅水窮霞盡處隱隱兩三峰其後流落之昂  
贈詩云遠山句好畫難成柳眼才多總是情今日  
衰顏人不識倚爐空聽煮茶聲又云二頃山田半  
欲蕪子孫零落一身孤寒窗昨夜蕭蕭雨紅日花

稍入夢無娥為泣下屏山外傳記之昂早得仕年  
三十三省掾考滿受平涼路轉運副使人謂卿相  
可坐致矣術士有言之昂官止五品者之昂不信  
也俄丁母憂為當途所忌連蹇十年卜居洛陽有  
薦其才于道陵者泰和初自司業擢左司郎中將  
大用矣會遼陽關大中欲搖執政賈鉉為言者所  
劾辭連之昂道陵震怒一時聞人皆譴逐之鉉尋  
亦罷政之昂降上京留守判官道卒竟如術者之  
言

醉後

禪僧勸讀傳燈錄道士教行進火功今日興來俱破戒  
黃花籬落醉西風



山中雨

嵩高山下逢秋雨，破繖遮頭過野橋。  
此景此時誰會得，清如窗下聽芭蕉。

即事 二首

雨洗明河畫扇收，胡床露冷藥闌秋。  
牆陰未得中庭月，一點螢光草際流。

山花山雨相兼落，溪水溪雲一樣閒。  
野店無人問春事，酒旗風外鳥關關。

宋元詩會卷六十二